



## SIARAN MEDIA

---

### KARNIVAL MINGGU SAINS NEGARA 2023 PERINGKAT NEGERI PAHANG SOKONG USAHA MEMBUDAYAKAN SAINS, TEKNOLOGI DAN INOVASI

---

**PEKAN, 11 November 2023** – Karnival Minggu Sains Negara (MSN) 2023 Peringkat Negeri Pahang anjuran bersama Kementerian Sains, Teknologi dan Inovasi (MOSTI) dan Pejabat Setiausaha Kerajaan Negeri Pahang dengan kerjasama Universiti Malaysia Pahang Al-Sultan Abdullah telah diadakan di Dewan Serbaguna, Universiti Malaysia Pahang Al-Sultan Abdullah, Pekan Pahang pada 10 dan 11 November 2023.

Yang Berhormat Dato' Mohamad Nizar bin Dato' Sri Mohamad Najib, Exco Pelaburan, Perindustrian, Sains, Teknologi Dan Inovasi Negeri Pahang mewakili YAB Dato' Sri Haji Wan Rosdy, Menteri Besar Pahang merasmikan Karnival MSN peringkat Negeri Pahang telah berjaya menarik lebih 3,000 penyertaan daripada komuniti setempat yang terdiri daripada pelajar sekolah, penuntut institusi pengajian tinggi serta orang awam.

Dalam ucapan perasmianya, YAB Menteri Besar Pahang, Dato' Sri Haji Wan Rosdy berkata, perubahan landskap pendidikan negara yang memberi penekanan kepada pembelajaran bidang Pendidikan, Latihan, Teknikal dan Vokasional (TVET) dan Pendidikan Sains, Teknologi, Inovasi dan Matematik (STEM) adalah berlandaskan kepada peralihan trend global yang mula berpaksikan sains, teknologi dan digital.

Beliau berkata, peralihan utama yang disaksikan dalam Pelan Revolusi Industri 4.0 (I.R 4.0) yang melanda seluruh dunia, merupakan isyarat jelas bahawa pendekatan dalam aspek pendidikan perlu berubah dalam menyediakan sumber tenaga manusia yang berkemahiran tinggi bagi menjamin daya maju dan daya pengeluaran sumber modal insan yang dapat mengisi keperluan masa hadapan.

“Negara perlu melahirkan lebih ramai pekerja berkemahiran tinggi dalam bidang TVET dan STEM yang diintegrasikan dalam bidang pendidikan negara di peringkat pengajian tinggi mahupun di peringkat permulaan pendidikan tertier. Justeru, inisiatif yang diambil dalam penganjuran karnival bertemakan TVET dan STEM ini amat penting untuk mengarusperdanakan bidang tersebut dalam kalangan anak-anak sekolah, golongan belia dan komuniti setempat.” katanya.

Kerajaan Negeri Pahang telah pun menyatakan hasrat agar sebuah pusat sains dapat dibangunkan di Negeri Pahang bagi memperhebatkan inisiatif pembudayaan yang berterusan dalam bidang sains, teknologi dan inovasi (STI) dan mengharapkan agar Negeri Pahang dapat menerima manfaat dan dilibatkan melalui program-program yang dirancang di peringkat Persekutuan.

Sementara itu menurut YBhg. Dato' Ts. Dr. Hj. Aminuddin Bin Hassim, Ketua Setiausaha MOSTI, "Kajian Pusat Maklumat Sains Dan Teknologi Malaysia (MASTIC) pada tahun 2019 menunjukkan bahawa antara punca rakyat tidak mengunjungi pusat sains dan seumpamanya adalah kerana faktor 'jarak' dan 'minat'. Kedua-dua faktor ini dapat diatasi dengan adanya Karnival MSN yang didatangkan kepada negeri-negeri dan menawarkan pelbagai pengisian interaktif di reruai pameran, demonstrasi sains dan bual bicara. Pengisian-pengisian ini yang berpaksikan sains, teknologi dan inovasi digarap mengikut kesesuaian masyarakat setempat."

Beliau turut menekankan bahawa pelaksanaan MSN adalah selaras dengan Pelan Tindakan Dasar Sains, Teknologi dan Inovasi Negara (DSTIN) 2021 - 2030. Pelan ini merupakan salah satu inisiatif MOSTI dalam usaha untuk menggerakkan pelaksanaan pelbagai inisiatif pembudayaan dan aktiviti kesedaran STI secara besar-besaran.

Pelbagai aktiviti menarik berteraskan STI disediakan sepanjang Karnival MSN 2023 yang berlangsung mulai 10 November 2023 (Jumaat) sehingga hari ini yang memberi manfaat kepada pengunjung antaranya Demonstrasi Kenderaan Elektrik, Demonstrasi Penerbangan Dron, *E-sport Challenge*, Aktiviti *Hands-On* Sains, Planet VR selain ceramah-ceramah STI.

Program-program MSN menyasarkan kepada pelbagai pemegang taruh seperti pelajar sekolah, belia kolej dan institusi pengajian tinggi, para guru, pemain industri serta orang awam.

Hadir sama ialah YBrs. Profesor Datin Ts. Dr. Mimi Sakinah bt Abdul Munaim, Penolong Naib Canselor, Pusat Jaringan Industri & Masyarakat, Universiti Malaysia Pahang Al-Sultan Abdullah (UMPSA).

Untuk maklumat lanjut mengenai Minggu Sains Negara dijemput untuk melayari laman web rasmi [minggusainsnegara.mosti.gov.my](http://minggusainsnegara.mosti.gov.my) .

**### TAMAT ###**

Disediakan oleh:

**KEMENTERIAN SAINS, TEKNOLOGI DAN INOVASI &  
PEJABAT SETIAUSAHA KERAJAAN NEGERI PAHANG  
11 NOVEMBER 2023**